

Pa su dedicacion, creatividad y exclusividad

A honra Gigliola Designs durante e "Aruba Business Award"

Gigliola Gomez ta e "Local Fashion Designer of the year 2014-2015"

CU varios otro nomber conoci den comunidad como nominadonan, e organisadonan di "Aruba Business Award" a scoge Gigliola Gomez di Gigliola Designs como e "Local Fashion Designer of the year 2014-2015". Pa e experto den moda y diseño di paña, e distincion aki ta bon bini y masha di aprecia.

E ultimo añanan Gigliola Designs a resalta cu su diseñonan den eventonan grandi local y internacional manera entre otro e certamen di Miss Universe, Miss Teen Aruba, Aruba Fashion Week, "Designers night" di Miss World Curaçao y e certamen mes di Miss World Curaçao. Tambe diferente personahenan importante den nos comunidad a sa di resalta cu su diseñonan unico. Sin duda algun un reconocimiento bon mereci!

Gigliola Gomez a cuminsa experimenta cu su creatividad for di tempo cu e tabatin 12 año di edad pero a dicidi di cuminsa oficialmente cu Gigliola Designs na año 2008, den cual el a cuminsa diseñá paña cu un creatividad unico cu e so tin. E ta crea, pinta y despues percura

pa su creacion traduci su mes den cosemento di trahenan espectacular cu ta hala atencion for di leu caba. E tin su propio "home studio" den cual a base diario e ta inspira pa yega na su creacionnan, basa riba bon uzo di tela, acesorionan, den combinacion cu e miho cosedonan riba nos isla.

Su carera mes den e industria di moda a cuminsa como modelo, unda el a participa den eventonan rond mundo, tanto na Aruba mes, na Europa, Latino America y den varios estado di Merca mes. El a start haciendo moda a base personal pero a crece den e industria y awendia tin su propio marca y coleccionnan. Como productor den e industria di moda, Gigliola Gomez a demostra su inspiracion y creatividad pa 8 año largo como e "Showcase Director" di Gucci, unda el a sa di percura pa varios articulonnan den revistanan y publicacionnan renombra.

Gigliola Designs ta un sostenido grandi di Mary Joan Breast Cancer Foundation, ya cu anualmente ta prepara diseñonan special pa sobrevivientenan di



cancer por participa den nan Pink Runaway Fashion Show cu awendia ta asina popular.

Gigliola Designs ta conta cu un lista largo di clientenan, cu ta varia for di amigonan, ehecutivoonan te na esunnan mas privilegia cu kier bisti nan propio diseño, creacionnan y cosina nan gusto y tamaño. Na año 2012, Gigliola Gomez tabatin e honor di por a bisti famia Real durante nan bishita na Aruba. E mesun año ey Gigliola Designs a percura pa presenta su ultimo liña di creacionnan durante

Aruba In Style Fashion event, unda a logra capta un audiencia mucho mas grandi.

Gigliola Gomez ta gradici Jenny Conde y su team cu a entreg'e cu e distincion special aki. Tambe ta gradici tur dama di Aruba cu a dun'e e oportunidad di resalta nan beyesa. E premio na Gigliola Arends y Gigliola Designs ta bini como un reconocimiento pa su creatividad unico, inspiracion y ideanan cu ta luci na curpa di su clientenan, un berdadero fashionista netamente Arubiano!